

針方六集

針方六集卷之二

開蒙集目錄

竇太師標幽賦

吳註 一

八法針方直訣八句

訓義 二

八法主治配合八條

三

五門針方說

四

十二經井榮俞原經合一覽圖

五

六十六穴日時主治

六

難經五門主治 七

十二經爲病補母瀉子成法 八

開蒙集目錄 終

針方六集卷之二

古歛鶴臯吳崐述

海陽忍菴程標梓

開蒙集

叙曰。針方神矣。失其傳者。未得其旨也。余討論針方。研窮今古。讀標幽而後神識通貫。遂揭八法五門。竝訓如左。署曰開蒙集。

標幽賦

宋北朝竇傑字漢卿。今廣平府肥鄉縣人。爲金太師。謚文貞。善針。嘗作此賦。予嘉之。註爲庭訓。○標榜也。猶表章也。針之爲道。玄微淵奧。故曰幽。拯救之法。妙用者針。

上古神良之醫。針爲先務。末世失其傳。故莫知其妙。竇氏妙之。其所得者深矣。

察歲時於天道。

歲有五運六氣。時有主客加臨。皆當察之以審病。

原。

定形氣於予心。

形有厚薄肥瘦堅脆。氣有長短怯壯虛實。皆當定之於心。以施針治。

春夏瘦而刺淺。秋冬肥而刺深。

春夏氣浮於表。故云瘦。秋冬氣沉於裏。故云肥。不窮經絡陰陽。多逢刺禁。

知病在經在絡。爲陰爲陽。則萬舉萬當。不明經絡。

陰陽妄施針治。則虛實失宜。刺家所禁。

旣論藏府虛實。須向經尋。

知藏府何者爲虛。何者爲實。各有所主。經穴宜尋其邪由。而施針治。

原夫起自中焦。水初下漏。太陰爲始。至厥陰而方終。穴出雲門。抵期門而最後。

此略言經穴起止。

正經十二。別絡走三百餘支。正側偃伏。氣穴有六百

餘候。

此略言經穴之數。

手足三陽。手走頭而頭走足。手足三陰。足走腹而胸走手。

手之三陽。從手走至頭。足之三陽。從頭走至足。手之三陰。從藏走至手。足之三陰。從足走入腹。

要識迎隨。須明逆順。

手足三陰三陽。經絡傳注。周流不息。逆順不同。針

金匱要略卷之六
法有迎隨補瀉。要識鍼法迎隨。須明經脉逆順。
况夫陰陽氣血。多少爲最。厥陰太陽。少氣多血。太陰
少陰。少血多氣。而又氣多血少者。少陽之分。氣盛血
多者。陽明之位。

多者易實。宜瀉其多。少者易虛。宜補其少。

先詳多少之宜。次察應至之氣。輕滑慢而未來。沉澹
緊而已至。旣至也。量寒熱而留疾。未至也。據虛實而
補引。氣之至者。若魚吞鈎餌之沉澹。氣未至者。似間

處幽堂之深邃。氣至速而效速。氣至遲而不治。

留者。久留其針於孔穴。疾者。疾出其鍼也。

觀夫九針之法。毫鍼最微。七星上應。衆穴主持。本形金也。有蠲邪扶正之道。短長水也。有決凝開滯之機。定刺象木。或斜或正。口藏比火。進陽補羸。循捫可塞。以象土。寔應五行而可知。

九針。鑱針。員針。鍤針。鋒針。鈹針。員利針。毫針。長針。大針也。毫針第七。取數於星。故云應七星。

然是一寸六分。包含妙理。

一寸六分。毫針之度也。上應七星。脩五行之象。是包含妙理。

雖細擬於毫髮。用貫多岐。

毫針爲質甚微。如下文平五藏。調六府。遣八邪。開四關。所貫何多岐。

可平五藏之寒熱。能調六府之虛實。

補之則寒者溫。瀉之則熱者涼。氣至則虛者實。氣

散則實者虛

拘攣閉塞遣八邪而去矣。

手足拘攣經隧閉塞八風之邪所爲也宜用針汗之遣去八風之邪。

寒熱痺痛開四關而已之。

四關乃十二經別走之絡爲陰陽表裏交通隘塞之地在於四末如往來之關隘故曰四關言爲寒爲熱爲痺爲痛皆四關閉塞所致宜開通四關而

已之。

凡刺者。使本神朝而後入。既刺也。使本神定而氣隨。神不朝而勿刺。神已定而可施。

本神。主宰本經元神也。前云氣至此云神朝。旨哉言矣。難經所謂知爲針者。信其左。乃本神朝穴也。自非神良。惡能道此。

定脚處。取氣血爲主意。

立定主意。氣病調氣。血病取血。調氣用迎隨補瀉。

取血則出凝結之血而已。蓋甚血不去。留之於經。則成病痺故也。

下手處認水土作根基。

水謂腎。土謂脾。腎水不虧者。如樹之有根。脾土不敗者。如室之有基。雖枝葉披離。垣墻頽敗。猶能建立。假令腎虧脾敗。是無根基。不足以施針治也。

天地人三才也。湧泉同璇璣百會。

湧泉二穴在足心。屈足蹠指縫中。與大指本節平。

等是穴。主持三焦諸疾。史記濟北王阿母患熱厥。足下熱。倉公刺足下立愈。蓋此穴也。璇璣一穴。在天突下一寸陷中。主胸膈諸疾。百會一穴。一名三陽五會。在頂中央。用草齊前後髮際。量折當中是穴。手足三陽督脈之會。主諸陽百病。史記號太子尸厥。扁鵲取三陽五會。有間。太子甦。蓋此穴也。言此三穴名曰三才。主上中下周身之疾。

上中下三部也。大包與天樞地機。

大包二穴。直腋下六寸。爲脾大絡。布胸脇。出九肋。及季脇端。別絡諸陰。總統陰陽。由脾灌溉五藏。天樞二穴。俠臍兩傍各二寸。胃脉所發。大腸募也。地機二穴。足太陰郄。空在膝下五寸。言此三穴皆脾胃所發。主中官氣血脾胃諸疾。

陽蹻陽維并督脉。主肩背腰腿在表之病。陰蹻陰維任衝帶。去心腹脇肋在裏之疑。

此論八法。孔穴分主表裏也。陽蹻謂申脉。陽維謂

外關督脉謂後谿。陰蹻謂照海。陰維謂內關。任謂列缺。衝謂公孫。帶謂臨泣。此八法孔穴也。爲針家一大法門。詳在八法註中。細論之。陽蹻督脉主表。陰蹻陰維任衝主裏。陽維帶脉主半表半裏者也。二陵二蹻二交。以續而交五大。

二陵。謂陰陵泉。陽陵泉。二蹻。謂陰蹻。陽蹻。二交。謂三陽交。三陰交。取此六穴者。以之相續於足。而交乎五體也。

兩間兩商兩井相依而列兩支。

兩間謂二間三間兩商謂少商商陽兩井謂天井肩井取此六穴者以之相依而列于兩手也。

足見取穴之法必有分寸先審其意次觀肉分或屈伸而得之或平直而安定在陽部筋骨之側陷下爲眞在陰分郄腠之間動脉相應取五穴用一穴而必端取三經用一經而可正頭部與肩部詳分督脉與任脉異定。

取穴之理。大率詳此。

明標與本。論刺深刺淺之宜。

病有標有本。必明何者爲標。何者爲本。急則治其標。緩則治其本。又諸經氣血爲病不同。四時肥瘠。淺深亦異。病在氣分及形瘠者宜刺淺。病在陰分及形肥者宜刺深。

住痛移疼。取相交相貫之經。

經脉直行者。有左右相交。絡脉別走者。爲表裏相

黃針家住痛移疼。取此交貫孔穴而已。徑路之小而捷者。指絡脉而言。

豈不聞藏府病。而求門海俞募之微。

門。謂五門。十二經之井榮俞經合也。謂之門者。以本經之氣由之出入也。海。謂四海。髓海。氣海。血海。水穀之海也。謂之海者。以其涵畜者大也。胃爲水穀之海。其輸上在氣街。下在三里。衝脉爲十二經之海。其輸上在大杼。下出于巨虛。之上下廉。臍中。

爲氣之海。其輸上在于柱骨之上下。前在于人迎。腦爲髓之海。其輸上在于其蓋。下在風府。俞謂肺俞。包絡俞。心俞。肝俞。膽俞。脾俞。胃俞。三焦俞。腎俞。大腸俞。小腸俞。膀胱俞。謂之俞者。藏府之氣於此轉輸也。募謂肺募中府。心募巨闕。肝募期門。脾募章門。腎募京門。胃募中脘。膽募日月。大腸募天樞。小腸募關元。三焦募石門。膀胱募中極。謂之募者。藏府之氣於此召募也。以上門海俞募之微。凡藏

府病者宜求之。

經絡滯。而求原別交會之道。

原。謂十二經之原。三焦之氣所遊行者也。肺之原
太淵。包絡之原太陵。肝之原太冲。脾之原太白。腎
之原太谿。心之原兌骨。即神門也膽之原丘墟。胃之原

冲陽。三焦之原陽池。膀胱之原京骨。大腸之原合
谷。小腸之原腕骨。五藏無原。以俞爲原也。別。謂十
二經別走之絡。爲陰陽表裏往來之關也。手太陰

別走陽明者爲列缺。手陽明別走太陰者爲偏歷。
手少陰別走太陽者爲通里。手太陽別走少陰者
爲支正。手厥陰別走少陽者爲內關。手少陽別走
厥陰者爲外關。足太陽別走少陰者爲飛陽。足少
陰別走太陽者爲大鍾。足陽明別走太陰者爲豐
隆。足太陰別走陽明者爲公孫。又爲漏谷。足少陽
別走厥陰者爲光明。足厥陰別走少陽者爲蠡溝。
交謂兩脉交貫也。左右相交如人中承漿前後相

交如陽交陰交是也。會者謂二經三經四經五經共會於一穴也。今詳考之。在頭部者。神庭爲督脉足太陽少陽之會。禁不可刺。本神爲足少陽陽維之會。頭維亦足少陽陽維之會。禁不可灸。百會爲督脉足太陽所會。風府爲督脉陽維之會。臨泣爲足太陽少陽陽維之會。目窗正營承臨。腦空皆足少陽陽維之會。率谷曲髻浮白。竅陰完骨皆足太陽少陽之會。風池爲足少陽陽維之會。在面部者。

會厭爲手少陽足陽明之會。懸釐爲手足少陽陽明之會。陽白爲足少陽陽維之會。睛明爲手足太陽足陽明之會。瞳子竅爲手太陽手足少陽之會。承泣爲陽蹻任脉足陽明之會。顴竅爲手少陽太陽之會。迎香爲手足陽明之會。巨竅爲陽蹻足陽明之會。水溝爲督脉手足陽明之會。地倉爲陽蹻手足陽明之會。承漿爲足陽明任脉之會。在耳部前後者。上關爲手少陽足陽明之會。下關爲足陽

明少陽之會。禾筇聽宮爲手足少陽手太陽之會。
角孫爲手足少陽手陽明之會。翳風爲手足少陽
之會。在頸部者。廉泉爲陰維任脉之會。在肩部者。
肩井爲足少陽陽維之會。巨骨爲手陽明陽蹻之
會。天髎爲手少陽陽維之會。肩髃爲手陽明陽蹻
之會。臑俞爲手太陽陽維陽蹻之會。秉風爲手陽
明太陽手足少陽之會。在胸部者。天突爲陰維任
脉之會。在腋脇者。天池爲手厥陰足少陽之會。在

腹部者。上腕爲任脉足陽明手太陽之會。中腕爲
手太陽少陽足陽明任脉之會。下腕爲足太陰任
脉之會。陰交爲任脉衝脉之會。關元中極爲足三
陰任脉之會。曲骨爲足厥陰任脉之會。會陰爲任
脉別絡督脉衝脉之會。幽門通谷陰都食關商曲
育命。中注。四滿。氣穴。大赫。橫骨。皆衝脉足少陰之
會。期門爲太陰厥陰陰維之會。日月爲足太陰少
陽之會。腹哀大橫皆爲足太陰陰維之會。府舍爲

足太陰陰維厥陰之會。衝門爲足太陰厥陰之會。
章門爲足厥陰少陽之會。維道爲足少陽帶脉之
會。肩髃爲陽蹻足少陽之會。在背部者。大椎爲足
太陽督脉之會。太脊爲手足太陽之會。風門爲督
脉足太陽之會。附分爲手足太陽之會。在手部者。
手三陰獨魚際爲諸陰絡之會。手三陽獨臂臑爲
手陽明絡之會。在足部者。三陰交爲足太陰少陰
厥陰之會。巨虛上廉爲足陽明與大腸合。巨虛下

廉爲足陽明與小腸合。懸鐘爲足三陽絡。以上諸經原別交會之道。凡經絡壅滯不得流通者。皆所當求也。

更窮四根三結。依標本而刺無不痊。

諸經根於四末。謂之四根。結於面部胸部腹部。謂之三結。先病者爲本。後病者爲標。旣窮根結標本。則病邪之巢穴蹊徑皆在目矣。治之有不痊者乎。但用八法五門。分主客而鍼無不効。

八法。公孫內關臨泣。外關後谿。申脉。列缺。照海。八
穴之法。五門。井榮俞經合。五者爲經氣所出入。若
門戶焉。故曰五門。主客無定位。但當經孔穴謂之
主。配合兼施孔穴謂之客。八法故有主客。五門有
母子先後。亦主客也。例之湯液。類有君臣佐使之
制乎。○嘗見一註云。八法者。循而捫之。切而散之。
推而按之。彈而怒之。抓而下之。通而取之。動而伸
之。推而內之。謂之八法。然此八句雖是經言。乃術

之粗者。竇公所指八法。開針家一大法門。能統攝諸病。簡易精絕。豈若是之粗陋哉。噫。道之不明也久矣。

八脉始終連八會。本是紀綱。

此覆言八法八穴。通於奇經八脉。與之始終。是爲八會。本是針家紀綱。諸經變病。不能出其範圍也。○嘗見一註云。八會者。血會膈俞。氣會臍中。脉會太淵。筋會陽陵泉。骨會大杼。髓會絕骨。藏會章門。

府會中脘。謂之八會。言似是而實非。有何始終連屬。悖甚悖甚。

十二經絡十二原。是爲樞要。

言取十二經別走之絡。及十二經真氣遊行之原。是爲樞機。要法守終。施博之道也。

一日取六十六穴之法。方見幽微。

此承午流注。孔穴法也。六陽經皆有井榮俞原經合。六六合三十六穴。六陰經無原。以俞代之。五六

合三十穴。共成六十六穴。法以十千分主其日。甲
日膽。乙日肝。丙日小腸。丁日心。戊日胃。己日脾。庚
日大腸。辛日肺。壬日膀胱。癸日腎。二焦寄壬。包絡
寄癸。陽日陽病取陽經。陰日陰病取陰經。子以斤
旺日時取穴開針。次第相生周而後已。方外謂之
周天針法。蓋以百刻而後已也。其理玄奧。故曰幽
微。

一時取十二經之原。始知要妙。

原者三焦之氣所遊行者也。用針者以候氣爲要。妙候氣之法。子時在手少陰。原曰神門。丑時在手太陰。原曰太淵。寅時在手少陽。原曰陽池。卯時在手陽明。原曰合谷。辰時在手太陽。原曰腕骨。巳時在手厥陰。原曰太陵。午時在足少陰。原曰太谿。未時在足太陰。原曰太白。申時在足少陽。原曰丘墟。酉時在足陽明。原曰冲陽。戌時在足太陽。原曰京骨。亥時在足厥陰。原曰太衝。氣穴廣矣。獨以此爲

生氣之原。按時取刺。知要妙乃爾。

原夫補洩之法。非呼吸而在手指。

呼吸之法。古人補瀉恒用之。補者呼盡內針。候吸引針。瀉者吸盡內針。候呼引針。此呼吸道也。然所以爲補洩者。不在呼吸之間。而在乎手指動退推內也。

速効之功。要交正而識本經。

交正者。十二經別走交會正經之蹊徑。絡脉是也。

本經受邪之經。針家求此而刺之。功效速矣。

交經繆刺。左有病而右畔取。

交經者。刺法與經脉左右相交也。經云。身有痛處而經不病者。行繆刺法。左病刺右。右病刺左。胸腹病刺四肢。繆其處也。所以然者。絡病而經不病故也。

瀉絡遠針。頭有病而脚上針。

凡繆刺之法。皆是瀉絡。瀉絡者。遠病而針。如頭有

病而脚上針。乃其道也。

巨刺與繆刺各異。

巨刺刺大經也。痛在於左而右脉病者。則巨刺之。邪客於經。左盛則右病。右盛則左病。亦有移易。左痛未已而右脉先病。如此者必巨刺之。必中其經。非絡脉也。繆刺解見上文。

微針與分刺相通。

微針者。刺微邪之針方。不傷大經者也。經曰。刺微

奈何。曰。按摩勿釋。着針勿斥。移氣於不足。神氣乃得復。又曰。我將深之。適人必革。精氣自伏。皆刺微邪之針方也。九針之內。如鑱針。鋙針。皆此妙義。分刺者。刺分肉之間。不犯大經。恐傷經氣也。微針亦不犯大經。不傷經氣。二法雖殊。義相通也。觀部分而知經絡之虛實。

此下二句。以脉言。脉之部分。兩寸有餘。兩尺不足。爲經滿絡虛。兩尺有餘。兩寸不足。爲絡滿經虛。蓋

兩寸爲手太陰之經。兩尺爲手太陰之絡。故也。周
身經絡有餘不足。並準於此。

視浮沉而辨藏府之寒溫。

脉來浮大爲陽爲溫。爲病在府。脉來沉細爲陰爲
寒。爲病在藏。

且夫先令針耀。而慮針損。次藏口內。而欲針溫。目無
外視。手如握虎。心無內慕。如待貴人。

言敬慎針事如此。

左手重而切按。欲令氣散。

欲令本經眞氣散去。不至傷損。

右手輕而除入。不痛之因。

穴中陰血不傷。故不痛。

空心恐怯。直立側而多暈。

空心恐怯。則神失其養。直立倚側。則體失所依。暈之由也。

背目沉摺。坐臥平而沒昏。

背目則神不驚。沉摺則神內定。坐臥平則四體有所倚着。宜無昏悶。

推於十干十變。知孔穴之開闔。論其五行五藏。察日時之興衰。

此以日時干支五行推藏府孔穴之開闔。乃候氣法也。

伏如橫弩。應若發機。

氣未至而不應。則針偃伏。如橫置之弩。扣之不發。

氣至而應。則迎隨補瀉若發機焉。疾莫如之矣。
陰交陽別而定血暈。

此經刺法也。陰交。臍下一寸之陰交。足三陰任衝
所會。陽別。卽陽交。一名別陽。足少陽所發。在外踝
上七寸。爲陽維之郄。斜屬三陽分肉間。言二穴留
針。則任脉之虛陽不起。少陽上升之氣歸原。故可
以定血暈。

陰躋陰維而下胎衣。

此絡刺法也。陰蹻謂照海。足少陰腎脉所發。陰維
謂內關。手厥陰心主所發。經脉傳注。以次相及。足
少陰注手厥陰。一定之序也。腎係胞胎。刺照海則
胞胎之氣洩而不固。刺內關則所謂迎而奪之也。
二穴洩其經氣。故下胎衣。

痺厥偏枯。迎隨俾經絡接續。

痺厥偏枯。乃風寒濕三者爲邪。流於經絡。經絡不
得接續而成病也。用針者。察病屬於何經。須迎而

奪之以去其邪。隨而濟之以補其正。則病去而氣血復矣。氣血復其常。寧復有痺厥偏枯乎。

崩漏帶下。溫補使氣血依歸。

崩漏帶下。乃氣血虛寒所致。法宜溫針補之。使氣血依歸。則崩漏帶下之疾去矣。

靜以久留。停針待之。

針出速則病多反覆。必久留其針。待病邪去盡。經氣平調。然後出針。此承上文而總結之也。

必准者。取照海治喉中之閉塞。

此瀉絡遠針之法也。照海腎經所發。腎脉循喉嚨。故主喉中閉塞。

端的處。用大鍾治心內之呆痴。

大鍾足少陰絡。別走太陽者。少陰腎脉其支者絡心。注胸中。故主心內呆痴。此亦遠刺法也。

大抵疼痛實洩。痒麻虛補。

諸疼痛者爲邪氣實。法宜瀉。諸痒麻者爲正氣虛。

法宜補。

體重節痛而俞居。心下痞滿而井主。

陽俞木。陰俞土。木主筋。筋根於節。土主肉。肉附於體。故體重節痛而取之於俞。陽井金。陰井木。金爲肺。肺病則貢鬱。木爲肝。木病則不得條達。故心下痞滿而取之於井。二句義本難經。

胸脹咽痛。針大衝而必除。

大衝足厥陰肝脉所發。肝脉上貫肝鬲。布脇肋。循

喉嚨之後。故主胸脹咽痛。此遠刺法也。

脾痛胃疼。瀉公孫而立愈。

公孫。足太陰脾脉所發。別走陽明者。其經屬脾絡胃。故主脾痛胃疼。亦遠刺法也。

胸滿腹痛。刺內關。

內關。手厥陰心主脉所發。別走少陽者。其經歷絡三焦。故主胸滿腹痛。亦遠刺法也。

脇疼肋痛。針飛虎。

飛虎。支溝也。以虎口交。中指飛到處是穴。故曰飛虎。手少陽脉氣所發。少陽行於身側。其經歷屬三焦。故主脇疼肋痛。亦遠刺法也。

筋攣骨痛而補魂門。

魂門。足太陽經所發。肝之部也。肝主筋。肝病而筋攣。骨痛者宜取之。此巨刺法也。

體熱勞嗽而洩魄戶。

魄戶。足太陽經所發。肺之部也。肺主氣。肺病而體

金匱要略卷之八
熱勞嗽者宜取之亦巨刺法也。

頭風頭痛刺申脉於金門。

刺申脉於金門言刺申脉於金門之分也。二穴相近皆足太陽脉所發足太陽之脉起目內眦上額交巔從巔至耳上角其直行者入絡腦還出別下項故主頭風頭痛此亦瀉絡遠針之法也。

眼痒眼疼瀉光明與地五。

光明地五會皆足少陽所發光明爲足少陽絡。

走厥陰者。少陽之脉。起於目銳眥。故主眼痒眼疼。亦洩絡遠針之法。

瀉陰郄。止盜汗。治小兒骨蒸。

陰郄。手少陰郄也。心血不足。則陽偏勝。而生內熱。令大人盜汗。小兒骨蒸。故瀉陰郄。以去內熱。內熱除。則盜汗骨蒸去矣。亦洩絡遠針之旨。

刺偏歷。利小便。醫大人水蠱。

偏歷。手陽明絡。別走太陰者。其經屬於大腸。太腸

之間爲闢門。主泌別清濁。故刺偏歷則大腸氣化而闢門通。小便利而水蠱愈矣。亦瀉絡遠針法也。中風環跳而宜刺。

環跳。足少陽脉氣所發。少陽爲木爲風。故刺中風者宜取之。此巨刺法也。

虛損天樞而可取。

天樞。足陽明脉氣所發。陽明居中土也。萬物之母。五藏百骸莫不受其氣而母之。故虛損者宜取天

樞刺而灼之可也。

由是午前卯後太陽生而疾溫。

午前卯後三陽生旺之時用針者乘時取氣而推內之則疾溫矣。

離左西南月魄虧而速冷。

離左西南三陽氣減之際用針者乘時迎瀉而動退焉則速冷矣此以陰道右旋推之也。

循捫彈怒留吸母而堅長。

以指循環於孔穴之上。謂之循。卽而摩之。謂之捫。
以指重搏孔穴。謂之彈。孔穴赤起。謂之怒。靜置其
針。謂之留。患人氣入。謂之吸。生我經穴。謂之母。肉
着於針。謂之堅。閏息而永。謂之長。言用循捫彈怒
留吸母諸法。皆所以補虛。虛得其補。則肉堅而息
長矣。

爪下伸提疾呼子而虛短。

以甲掐取孔穴。謂之爪。針隨而入。謂之下。引出豆

許謂之伸。針起肉隨謂之提。急出其針謂之疾。患人呵氣謂之呼。所生經穴謂之子。肉不着針謂之虛。聲微氣劣謂之短。言用爪下伸提疾呼子諸法皆所以瀉實。實得其瀉則經虛而息短矣。

動退空歌迎奪右而瀉涼。

搖動其針謂之動。引針少出謂之退。不捫針痛謂之空。不復用針謂之歇。先邪取穴謂之迎。大瀉其邪謂之奪。右旋其針謂之右。以上諸法皆所以瀉

實而令熱者涼也。

推內進搓隨濟左而補暖。

持針力入謂之推。刺入穴分謂之內。漸次入深謂之進。拈轉其針謂之搓。後邪取穴謂之隨。引氣益之謂之濟。左旋其針謂之左。以上諸法皆所以補虛而令寒者暖也。

慎之大凡危疾色脉不順而莫針。

病人色脉相生者吉。色脉相尅者凶。不可更施針。

治。

寒熱風陰。飢飽醉勞。而切忌。

寒熱風陰。天氣之乖和也。飢飽醉勞。人氣之乖和也。如是者皆不宜刺。

望不補而晦不瀉。弦不奪而朔不濟。

人身營氣與大陰同其盈虧。故當其盈而補。是謂重實。令人絡有留血。當其虧而洩。是謂重虛。令人益困。

精其心而窮其法。無灼艾而壞其肌。

脉証爲寒爲積。爲氣虛胃弱者。宜灼艾。爲風爲火。爲熱爲血虛者。不宜灼艾。

正其理而求其原。免投鍼而失其位。

病有理有原。必正其理。求其原。何者。宜針經。何者。宜針絡。不然。投針失位。無益也。

避刺處而和四支。四十有六。

中心 中肺 中肝 中脾 中腎 中膀胱

中膽 中膈 跗上 陰股 面中 客主人
腦戶 膝臑 郄中 膺中 氣街 太淵血
缺盆 乳房 乳中 雲門 臍中 少陰血
鳩尾 神庭 顙息 左角 人迎 足下中脉
石門 伏兔 會陰 脊髓 承筋 肘內陷
然谷 橫骨 青靈 五里 眶上陷 面承泣
三陽絡 關節液出 腋脇內陷 孕婦三陰交
禁灸處而除六俞三十有二

頭維 承光 腦戶 下關 殷門 絲竹空

人迎 承泣 脊中 乳中 氣街 白環俞

淵液 經渠 鳩尾 四白 陽關 石門女子禁

天府 伏兔 瘰脉 啞門 風府 地五會

素髻 睛明 迎香 禾髻 顴竅 心俞

氣衝 陰市

抑又聞高皇抱疾未瘥。李氏刺巨關而得甦。

高皇。金之高皇。李氏。今不能考。巨關心之募也。主

五藏氣相干。卒心痛尸厥。此巨刺也。

太子暴死爲尸厥。越人針維會而得醒。

太子號太子。越人盧醫秦越人也。史稱號太子病尸厥。扁鵲爲之刺三陽五會。有間。太子甦。則百會穴也。此云維會。則非百會。針經云。臍中一名維會。謂扁鵲當時取此穴耳。蓋人之生。嘗以此穴受母之氣。刺家能取此穴。調其厥逆。使之中和。亦何嫌於刺哉。臍中爲是。古之神良。固未嘗以禁刺膠鼓。

也。

肩井曲池。甄權刺臂痛而復射。

魯州刺史庾伏缺患風痺。甄權取此二穴刺之。立能援弓引射。亦經刺也。

懸鍾環跳。華陀刺躄足而立行。

懸鍾爲絡刺。環跳爲經刺。皆足少陽經所發。足少陽爲甲木。故主風。能治躄足。

秋夫針腰俞。而鬼免沉痾。王墓針交俞。而妖精立出。

鑿文從巫。以其通於鬼神也。故治鬼出妖。不爲幽
妄。聖人不語。術士傳焉。余煮餅方中。主以五毒。五毒者。官桂。川烏。麝。白。狼毒。自然同也。復用真人手符。爲降魔驅妖計
也。交俞。非古穴。說者以爲人中三陰交。近是。

刺肝俞與命門。使瞽士視秋毫之末。

肝俞。足大陽脉氣所發。肝氣於此轉輸。故曰肝俞。
目爲肝之竅。故刺之。命門。非督之命門。亦非任之
命門。靈樞根結論曰。命門者。目也。謂睛明穴。此治

外障法也。治內障者宜刺睛中穴。其法候於暑月。先以涼水沃之。以凝其血。次用三稜針點穴。繼以黃金毫針刺入。撥去內障。五年十年不見物者。立能見物。復明如舊。其刺始於龍木禪師。詳載大藏經中。神妙神妙者也。所以必用涼水者。非水涼之。則血不凝。能令血貫瞳人。不能復治矣。如水涼之不足。爲患亦同。故於將出針時。宜更以涼水沃之。所以必候暑月者。非暑月不足以勝涼水故也。識

之慎之。

刺睛中穴法。
附前神照集。

取少陽與交別。俾聾天聰。夏蚋之聲。

取少陽。取其結於耳者。翳風是也。爲手足少陽之
會。交於手少陽者爲內關。別於手少陽者爲外關。
交於足少陽者爲蠡溝。別於足少陽者爲光明。外
關與內關平等。光明與蠡溝亦平等。皆一針可取。
二穴者也。手足少陽脉皆入耳。故治耳聾。此亦瀉
絡遠針之法。

嗟夫。去聖愈遠。此道漸墜。或不得意而散其學。或愆其能而犯禁忌。愚庸志淺。難契於玄言。至道淵深。得之者有幾。偶述斯言。不敢示諸明達者焉。庶幾乎童蒙之心啓。

次

八法針方二

八法者。八穴之法。公孫內關。臨泣外關。後谿申脉。列缺照海是也。以八穴交會奇經八脉。而分主乎

表在乎裏。主乎表裏之間也。仲景妙於傷寒。以其有六經之辨。予今以八法爲妙者。以其分主八脉。而該乎十二經也。創爲針家一大法門。求之古籍。不稱作者何人。或以爲少室異人所傳。理或然也。蓋在竇氏之前。已有其教。每下針以四疇爲主。皆瀉絡遠針之法。四面攻討之兵也。刺家但主八法。隨証加針。不過五七孔穴。無難去之疾矣。訓如後方。

公孫

合

臨泣

合

後谿

合

列缺

合

內關

外關

申脉

照海

訣曰

公孫衝脉胃心胸。內關陰維會總同。

公孫二穴在足大指內側本節後一寸白肉際足太陰絡別走陽明者。內關二穴在手臂內兩筋之間去掌後橫紋二寸手心主絡別走少陽者。言公孫二穴通乎奇經之衝脉。內關二穴通乎奇經之

陰維脉。衝脉起止併足少陰。循腹裏。從肺出絡心。注胸中。故主胃與心胸諸疾。陰維者。維持腹內六陰之脉也。手心主之脉起于胸中。出属心包絡。下膈。歷絡三焦。故亦主胃與心胸諸疾。而云會總同也。取此四穴針氣一行之後。三焦快然。疾去內和。例之湯液。則瀉心。涼膈。大小陷胸。調胃承氣諸方之力也。

臨泣膽經連帶脉。陽維目銳外關逢。

臨泣二穴。在足小指次指本節後外側筋骨縫陷者中。足少陽膽經之所注也。外關二穴。在腕後二寸。兩骨間陷者中。手少陽絡別走手心主者。帶脉爲奇經之一。環身一週。若束帶然。故名帶脉。陽維爲奇經之一。維持諸陽。抵目外眦。四穴者。主手足少陽半表半裏諸疾。針氣一行之後。中外皆和。營衛流暢。例之湯液。則三化雙解。大小柴胡。通聖溫膽。諸方之力也。

後谿督脉內眥頸申脉陽蹻絡亦通。

後谿二穴在手小指本節後一寸。橫紋尖上陷中。
拳而取之。手太陽脉所注。申脉二穴在足外踝下
陷中。容爪甲許。言後谿通乎督脉。申脉爲陽蹻所
生。四穴主手足太陽二經諸疾。針氣一行。大汗如
注。則表邪盡去。例之湯液。則桂枝麻黃葛根大小
青龍諸方之旨也。

列缺會任行肺系。陰蹻照海膈喉嚨。

列缺二穴。去腕一寸五分。兩手交捩。食指點到處
是穴。當筋骨罅中。手太陰之終。別走陽明者。照海
二穴。足少陰腎經所發。在足內踝骨下一寸白肉
際。陰蹻脉所生。言列缺二穴。會乎任脉而行於肺
系。照海二穴。爲陰蹻脉所生。少陰腎脉所發。少陰
腎脉循喉嚨。系舌本。取此四穴。針氣一行之後。肺
膈安和。喉嚨清利。例之湯液。則二冬二母。犀芩。甘
桔。諸方之旨也。○以上八法。下針必以四穴爲主。

或補手而瀉足。或補足而瀉手。左右亦復如是。如
兵之奇正相生。或以正爲奇。或以奇爲正。針之善
物也。○旁通集中揆八法四條宜互玩

公孫二穴主治二十七證 必取內關二穴配合

九種心痛

痰膈涎悶

臍腹痛脹

脇肋疼痛

產後血迷

氣膈食不下

泄瀉不止

疝氣疼痛

裏急後重

傷寒結胸

水蠱酒痰

滿悶嘔吐

腹脇脹痛

腸風下血

脫肛不收

氣高

食高不下

食積疼痛

癖氣食癖

酒癖

兒枕痛血塊

腹鳴

血刺痛

小兒瀉

瀉腹痛

胸中刺痛

瘧疾心痛

內關二穴主治二十五證 必取公孫二穴配合

中滿不快

傷寒結胸

心胸痞滿

吐逆不定

胸滿痰膈

腹痛

泄瀉滑腸

酒痰膈痛

米穀不化

橫豎弦氣

小兒脫肛

九種心痛

脇肋痛

腸鳴

婦人血刺痛

積塊痛

男子酒癖

二膈心下痞痛

氣膈食不下

腹肋脹痛

腸風下血

傷寒

裏急後重

食膈食不下

、
痃瘕寒熱

臨泣二穴主治二十五證

必取外關二穴配合

足跌腫痛

手足麻

手指擅掉

赤眼冷泪

咽喉腫痛

手足攣急

脇肋痛

牙齒痛

手足發熱

解利傷寒

腿跨痛

脚膝腫痛

四肢不遂

頭風腫

頭頂腫

浮風搔痒

身體腫

身體麻

頭目眩暈

筋攣骨痛

頰顙痛

雷頭風

眼目腫痛

中風手足不舉

耳聾

外關二穴主治二十七證 必取臨泣二穴配合

肢節腫痛

臂膊冷痛

鼻衄

手足發熱

眉稜中痛

指節痛不能屈伸

手足疼痛

產後惡風

傷寒自汗

頭風

四肢不遂

筋骨疼痛

迎風淚出

赤目疼痛

腰背腫痛

眼腫

傷寒表熱

手足麻痛無力

金匱要略
破傷風

手臂痛

頭風揮眩痛

頭項痛

盜汗

目翳隱澁

產後身痛

腰跨痛

雷頭風

後谿二穴主治二十四證 必取申脉二穴配合

手足攣急

手足攣掉

頭風痛

傷寒不解

盜汗不止

中風不語

牙齒痛

癰癩吐沫

腰背強痛

筋骨痛

咽喉閉塞

頰顙腫痛

傷寒項強痛

膝脛腫痛

手足麻

眼赤腫

傷寒頭痛

表汗不出

衝風淚下

破傷風搐

產後汗出惡風

喉痺

腳膝腿痛

手麻痺

申脉二穴主治二十五證 必取後谿二穴配合

腰背強痛

肢節痛

手足不遂

傷寒頭痛

身體腫滿

頭面自汗

癰瘤

目赤腫痛

傷風自汗

頭風痒痛

眉稜痛

雷頭風

手臂痛

臂冷

產後自汗

鼻衄

破傷風

肢節腫痛

腿膝腫痛

耳聾

手足麻

吹妳

沈頭風

手足攣

產後惡風

列缺二穴主治三十一證 必取照海二穴配合

寒痛泄瀉

咽喉腫痛

婦人血積敗血痛

牙齒腫痛

小腸氣撮痛

死胎胎衣不下

脇癖痛

吐唾膿血

咳嗽寒痰

疝氣

食噎不下

臍腹撮痛

心腹痛

腸鳴下利

痔痒漏血

心痛溫痢

產後腰痛

產後發狂

產後不語

米穀不化

男子酒癖

乳癰腫痛

婦人血塊

溫病不瘥

吐逆不止

小便下血

小便不通

大便閉塞

大便下血

胃腸痛病

諸積爲患

照海二穴主治二十七證

必取列缺二穴配合

喉嚨閉塞

小便冷痛

小便淋瀝不通

膀胱氣痛

婦人血暈

胎衣不下

臍腹疼痛

小腹胀滿

反胃吐食不納

腸癖下血

酒癖

中滿不快

洩瀉

食不化

腸鳴下利腹痛

難產

婦人血積

兒枕痛

嘔吐

酒積

疝氣

氣塊

酒痺

氣膈

食勞黃

足熱厥

大便不通

右法。先刺主證之穴。隨病左右上下所在取之。仍循捫導引。按法祛除。如病未已。必求配合孔穴。兼施處治。須要停針。待氣上下相接。快然無所苦。而後出針。

次

五門鍼方說四

五門者。十二經并榮俞經合也。藏府之氣由之開闔。若門戶焉。故曰五門。以十二經分主日時六十六穴。周而復始。循環無已。故錯舉其義。謂之子午流注。當其時謂之開。非其時謂之闔。陽病用陽日。陽時。陰病用陰日。陰時。又有五行相生之義。因其功行一晝夜而始備。又謂之大周天針法。以之祛

邪無邪不去以之調氣無氣不調寔隆古之針方也今以其成法述之如左

○十二經井榮俞原經合一覽圖

五

肺 腎 肝 心 脾 包絡

井木 少商 湧泉 大敦 少衝 隱白 中衝所出

榮火 魚際 然谷 行間 少府 大都 勞宮所流

俞土 大淵 太谿 太衝 神門 太白 太陵所注

經金 經渠 復溜 中封 靈道 商丘 間使所行

金匱要略卷之八
合水

尺澤

陰谷

曲泉

少海

陰陵

曲澤

入所

大腸

膀胱

膽

小腸

胃

三焦

井金

商陽

至陰

竅陰

少澤

厲兌

關衝

出所

榮水

二間

通谷

俠谿

前谷

內庭

液門

所流

俞木

三間

束骨

臨泣

後谿

陷谷

中渚

所注

原

合谷

京骨

丘墟

腕骨

衝陽

陽池

所過

經火

陽谿

崑崙

陽輔

陽谷

解谿

支溝

所行

合土

曲池

委中

陽陵

小海

三里

天井

入所

膽主甲日 六

甲戌時竅陰 井膽

丙子時前谷 榮小腸

戊寅時陷谷 俞胃

并過本原坵墟

庚辰時陽谿 經大腸

壬午時委中 合膀胱

甲申時氣合三焦液門 水

肝主乙日

乙酉時大敦 井肝

丁亥時少府 榮心

己丑時太白 俞脾
過太衝

辛卯時經渠 經肺

癸巳時陰谷

合腎

乙未時血納包絡勞宮

火

小腸主丙日

丙申時少澤

井小腸

戊戌時內庭

榮胃

庚子時三間

俞大腸

過本原腕骨

壬寅時崑崙

經膀胱

甲辰時陽陵泉

合膽

丙午時氣納三焦中渚

水

心主丁日

丁未時少衝

井心

己酉時大都

榮脾

辛亥時大淵

俞肺
過神門

癸丑時復溜

經腎

乙卯時曲泉

合肝

丁巳時血納包絡太陵

土

胃主戊日

戊午時厲兌

井胃

庚申時二間

榮大腸

壬戌時束骨

俞膀胱

過本原衝陽

甲子時陽輔

經膽

丙寅時小海

合小腸

戊辰時氣納三焦支溝

火

脾主巳日

巳巳時隱白 井脾

辛未時魚際 榮肺

癸酉時太谿 俞腎
過太白

乙亥時中封 經肝

丁丑時少海 合心

巳卯時血納包絡間使 金

太腸主庚日

庚辰時商陽 井大腸

壬午時通谷 榮膀胱

甲申時臨泣 俞膽

過本原合谷

丙戌時陽谷 經小腸

戊子時三里 合胃

庚寅時氣納三焦天井 土

肺主辛日

辛卯時少商

井肺

癸巳時然谷

榮腎

乙未時太衝

俞肝
過太淵

丁酉時靈道

經心

巳亥時陰陵泉

合脾

辛丑時血納包絡曲澤

水

膀胱主壬日

壬寅時至陰

井膀胱

甲辰時俠谿

榮膽

丙午時後谿

俞小腸

過本原京骨

戊申時解谿

經胃

庚戌時曲池

合大腸

壬子時氣納三焦關衝金

腎主癸日

癸丑時湧泉井腎

乙卯時行間榮肝

丁巳時神門俞心
過太谿

己未時商丘經脾

辛酉時尺澤合肺

癸亥時血納包絡中衝木

右子午流注開闔之法。乃治神之方也。神治而氣血隨之矣。蓋自靈樞本輸已發其端。古今知者鮮矣。惟竇公獨擅其術。用以治神。然不能無說焉。既

曰六十甲子循環治時。奈何內缺甲午。申寅庚午。
壬辰壬申丙辰乙丑乙巳辛巳丁卯癸未癸卯。豈
此十二時中。榮衛之氣不行耶。又壬寅壬午庚辰。
丙午甲辰甲申乙未乙卯辛卯丁巳癸巳癸丑。皆
主兩穴。豈一時之中。兩穴並開耶。言及於此。非所
以攻昔人之瑕。實所以傳昔人之神。又賦云。六十
六穴。今但得六十五穴。而缺陽池一穴。無所安置。
豈陽池獨外於子午耶。語曰。民可使由之。不可使

知之前言治神之方。亦妄洩爾。

難經五門主治七

經言所出爲井。所流爲榮。所注爲俞。所行爲經。所入爲合。井主心下滿。榮主身熱。俞主體重節痛。經主喘咳寒熱。合主逆氣而泄。此五藏六府井榮俞經合主病也。今演其方如左。

假令得弦脉。病人善潔。面青。善怒。此膽病也。若心下

滿當刺竅陰

井

身熱刺俠谿

榮

體重節痛刺

臨泣

俞

喘咳寒熱刺陽輔

經

逆氣而洩刺陽

陵泉

合

又總取丘墟

原

得弦脉。病人淋洩難轉筋。四肢滿閉。臍左有動氣。此

肝病也。若心下滿當刺大敦

井

身熱刺行間

榮

體重節痛刺太衝

俞

喘咳寒熱刺中封

經

逆

氣而泄刺曲泉

合

得浮洪脉。病人面赤。口乾喜笑。此小腸病也。若心下

滿刺少澤

井

身熱刺前谷

榮

體重節痛刺後

谿俞

喘咳寒熱刺陽谷經

逆氣而洩刺小海

合

又總刺腕骨原

得浮洪脉。病人煩心。心痛。掌中熱而腕。臍上有動氣。

此心病也。若心下滿刺少衝井

身熱刺少府榮

體重節痛刺神門俞

喘咳寒熱刺靈道經

逆

氣而洩刺少海合

得浮緩脉。病人面黃。善噫。善思。善味。此胃病也。若心

下滿刺厲兌井

身熱刺內庭榮

體重節痛刺

陷谷

俞

喘咳寒熱刺解谿

經

逆氣而洩刺三

里

合

又總刺衝陽

原

得浮緩脉。病人腹脹滿。食不消。體重節痛。怠惰嗜臥。

四肢不收。當臍有動氣。按之牢若痛。此脾病也。若

心下滿刺隱白

井

身熱刺大都

榮

體重節痛

刺太白

俞

喘咳寒熱刺商丘

經

逆氣而泄刺

陰陵泉

合

得浮脉。病人面白善噫。悲愁不樂。欲哭。此大腸病也。

若心下滿刺商陽

井

身熱刺二間

榮

體重節

痛刺三間

俞

喘嗽寒熱刺陽谿

經

逆氣而泄

刺曲池

合

又總刺合谷

原

得浮脉。病人喘嗽。洒淅寒熱。臍右有動氣。按之牢若

痛。此肺病也。若心下滿。刺少商

井

身熱刺魚際

榮

體重節痛。刺太淵

俞

喘嗽寒熱。刺經渠

經

逆氣而洩。刺尺澤

合

得沉遲脉。病人面黑。善恐。欠。此膀胱病也。若心下滿

刺至陰

井

身熱刺通谷

榮

體重節痛刺束骨

俞

喘嗽寒熱刺崑崙

經

逆氣而泄刺委中

合

又總刺京骨

原

得沉遲脉。病人逆氣。小腹急痛。泄如下重。足脛寒而

逆。此腎病也。若心下滿。刺湧泉

井

身熱刺然谷

榮

體重節痛刺太谿

俞

喘嗽寒熱刺復溜

經

逆氣而泄刺陰谷

合

得洪大脉。病人渾渾焯焯。耳聾咽痺。汗出。此三焦病。

也。若心下滿刺關衝

井

身熱刺液門

榮

體重

節痛刺中渚

俞

喘嗽寒熱刺支溝

經

逆氣而

泄刺天井

合

又總刺陽池

原

得洪大脉。病人面赤目黃。腋腫。胸脇支滿。手心熱。心

中動。此心包絡病也。若心下滿刺中衝

井

身熱

刺勞宮

榮

體重節痛刺大陵

俞

喘嗽寒熱刺

間使

經

逆氣而泄刺曲澤

合

以上五門主治。古針方也。蓋以陽井金。陰井木。所

以主治心下滿者。金病則賁鬱。木病則不得條達。故令心下滿也。陽榮水。陰榮火。水病則陰虧。火病則益熾。故令身熱。陽俞木。陰俞土。木主筋。筋根於節。土主肉。肉附於體。故令體重節痛。陽經火。陰經金。火乘於金。則病喘嗽。金火相戰。金勝則寒。火勝則熱。故主喘嗽寒熱。陽合土。陰合水。水敗則火失其制。而作氣逆。土敗則水失其防。而作洞泄。故主氣逆而泄。此五門主治之義也。

○十二經爲病補母瀉子成法八

肺手太陰爲病。肺脹。膨膨而喘嗽。缺盆中痛。甚則交
兩手而瞋。是爲臂厥。所生病咳嗽喘喝。煩心。胸滿。
臑臂內前廉痛。掌中熱。氣有餘則肩背痛。汗出中
風。小便數而欠。寸口大三倍於人迎。虛則肩背痛
寒。少氣不足以息。溺色變。卒遺失無度。寸口反小
於人迎也。

補太淵

爲經爲土爲母

瀉尺澤

為合為水為子

大腸手陽明為病。齒痛頰腫。是主津所生病。目黃。口乾。衄血。喉痺。肩前臑痛。大指次指不用。氣有餘則當脉所過者熱腫。人迎大三倍於寸口。虛則寒慄。人迎反小於寸口也。

補曲池

為合為土為母

瀉二間

為榮為水為子

胃足陽明為病。洒洒然振寒。善伸數欠。顏黑。惡人與

火聞木聲則惕然而驚。心動欲閉戶牖而處。甚則欲登高而歌。棄衣而走。責响腹脹。是爲肝厥。是主血所生病。狂癡。濕淫汗出。鼽衄。口喎唇脣。喉痺。大腹水腫。膝膕腫痛。循胸乳。氣街。股。伏兔。跗外廉。足跗上皆痛。中脂不用。氣有餘則身以前皆熱。其有餘於胃。則消穀善肌。溺色黃。人迎大三倍於寸口。氣不足則身以前皆寒慄。胃中寒則脹滿。人迎反小於寸口也。

補解谿爲經爲火爲母

瀉厲兌爲井爲金爲子

脾足太陰爲病。舌本強。食則嘔。胃脘痛。腹脹善噫。得後出與氣則快然如衰。身體皆重。是主脾所生病。舌本痛。體不能動搖。食不下。煩心。心下急痛。寒瘧。癢。溇泄。水閉。黃疸。不能臥。強立。膝股內腫厥。足大指不用。盛者寸口大三倍於人迎。虛者寸口小三倍於人迎也。

補大都

爲榮爲火爲母

瀉商丘

爲經爲金爲子

心手少陰爲病。嗌乾心痛。渴而欲飲。是爲臂厥。主心
所生病。目黃。脇痛。臍臂內後廉痛。厥掌中熱。盛者
寸口大再倍於人迎。虛者寸口反小於人迎也。

補少衝

爲井爲木爲母

瀉神門

爲俞爲土爲子

小腸手太陽爲病。嗌痛頷腫。不可回顧。肩似拔。臍似

折。是主液所生病。耳聾目黃。頰腫。頸領肩臑肘臂
外後廉痛。盛者人迎大再倍於寸口。虛者人迎反
小於寸口也。

補後谿

爲俞爲木爲母

瀉小海

爲合爲土爲子

膀胱足太陽爲病。頭痛似脫。項似拔。脊痛。腰似折。髀
不可以曲。脰如結。臑似裂。是爲踝厥。是主筋所生
病。痔瘡狂癲。頭顙頂痛。目黃淚出。眦衄。項背腰尻

腫脰脚皆痛。足小指不用。盛者人迎大再倍於氣口。虛者人迎反小於氣口也。

補至陰

爲井爲金爲母

瀉束骨

爲俞爲木爲子

腎足少陰爲病。飢不欲食。面黑如炭色。欬唾則有血。喝喝而喘。坐而欲起。目眈眈然如無所見。心如懸飢狀。氣不足則善恐。心惕然如人將捕之。是謂骨厥。是主腎所生病。口熱舌乾。咽腫上氣。嗌乾及痛。

煩心心痛。黃疸腸癖。脊股內後廉痛。痿厥嗜臥。足
下熱而痛。盛者寸口大再倍於人迎。虛者寸口反
小於人迎也。

補復溜

爲經爲金爲母

瀉湧泉

爲井爲木爲子

心包絡手厥陰爲病。手心熱。臂肘攣痛。腋腫。甚則胸
脇支滿。心中澹澹大動。面赤目黃。善笑不休。是主
心包絡所生病。煩心心痛。掌中熱。盛者寸口大一

倍於人迎。虛者寸口反小於人迎也。

補中衝

爲井爲木爲母

瀉太陵

爲俞爲土爲子

三焦手少陽爲病。耳聾。渾渾惇惇。咽腫喉痺。是主氣。所生病。汗出。目銳眦痛。頰痛。耳後肩臑肘臂外皆痛。小指次指不用。盛者人迎大一倍於寸口。虛者人迎反小於寸口也。

補中渚

爲俞爲木爲母

瀉天井

爲合爲土爲子

膽足少陽爲病。口苦。善太息。心脇痛。不能轉側。甚則面微有塵。體無膏澤。足外反熱。是爲陽厥。是主骨所生病。頭角領痛。缺盆中腫痛。腋下腫。馬刀俠纓。汗出。振寒。寒瘧。胸脇肋髀膝外至脛絕骨外踝前及諸節皆痛。小指次指不用。盛者人迎大一倍於寸口。虛者人迎反小於寸口也。

補俠谿

爲榮爲水爲母

瀉陽輔

爲經爲火爲子

肝足厥陰經爲病。腰痛不可俛仰。丈夫頰疝。婦人小腹腫。甚則嗌乾。面塵脫色。是主肝。所生病。胸滿嘔逆。洞泄。狐疝。遺溺。癰閉。盛者寸口大一倍於人迎。虛者寸口反小於人迎也。

補曲泉

爲合爲水爲母

瀉行間

爲榮爲火爲子

針方開蒙集

終